



Inatsisartunut ilaasortaq,
Hans Enoksen
Naleraq
Maani/

**Aalisarneq pillugu inatsit aamma suliffiit pillugit § 37 naapertorlugu
apeqquteqammut nr. 91-imut akissut**

Ulloq: 14-05-2024
Suliap normua: 2024 - 9286
All. nr. 24143006

Inatsisartut suleriaasianni § 37-mi imm. 1 naapertorlugu aalisarneq pillugu inatsit aamma suliffiit pillugit Naalakkersuisunut apeqquteqarputit. Apeqqut suliassa qarfigisannit akineqartussanngorlugu innersuunneqarnikuuvoq.

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanoq.gl
www.naalakkersuisut.gl

- 1) Aalisartut nunamut qaqisussat aalisakkerivinnilu sulisartut aalisarnermut inatsisikkut eqqorneqartussat Naalakkersuisut saqqummiussaasa ilaanni oqaatigineqarpoq suliffissaqartinneqarumaartut. Suunuku suliffissat nutaat eqqartorneqartut aammalu aningaasarsinarnerusut suuppat taakku?**

1-mut) PNNP-mut ikaarsaariarusunnerlutik aalisartut nammineq aalajangissavaat. Aalisartut namminneerlutik PNNP-mut ikaarsaassanerlutik kingornalu pisassiissutinik nammineq pigisaminnik tunisiniarunik inuussutissarsiutinullu allanut nuunnissartik kissaatigippassuk, immikkoortuni amerlasuuni annertuumik sulisussaaleqisoqalissaaq soorlu makkunani sanaartormik illuliornermillu suliaqarfiit, peqqinnissaqarfik, paaqqinniffiit, takornariaqarneq il.il. Taamaattumik sumi sulererusunnerlutik inuit namminneq aalajangerluarsinnaavaat.

Suliffeqarfiit sorliit akissarsiaqartitsinerunersut apeqqutigineqartarpoq. Matumani suna isumarineqarnersoq ersarluppoq, apeqqut tamakkiisumik akineqarsinnaatinnagu suna pineqarnersoq itisilerneqartariaqarpoq. Aalisartunik suliffissuarmilu sulisunik akissarsiaqartitsineq nalinginnaasumik siammasissorujussuuvoq. Taamaattoq ilinniagaqassutsip akissarsiaqartitsinerullu akornanni nalinginnaasumik ataqaatigiittoqarpoq, ilinniagaqarsimaneruneq annerusumik akissarsiaqartitsisarmat.

- 2) Pineqartut allani sulissagunik avaqqunneqarsinnaanngilaq illoqarfimmut allamut nutsernissaq tamakkua nutsernissaanut najugassaqartinneqarpat aammalu suliffissaqartinneqarpat?**

2-mut) Apeqqutaavoq nuunnissaq pisariaqarnersoq aamma sumut nuukkusunnersut. Taamaattorli pisassiissutinik namminneq pigisaminnik tuniseriarlutik taamalu aalisarnermiit aneriartutik inissaq aammalu suliffissaq qulakkeeqqaarnagit illoqarfimmiit allamiit illoqarfimmut allamut nuunnissaat Naalakkersuisut naatsorsuutiginnilaat.

- 3) Ilanngullugu Naalakkersuisunik oqaatigineqarpoq suliffeeruttussat aalisartuujunnaartussallu aamma ilinniaqarnissaat aaqqissuunneqassasut.**

Sumiuna ilinniarfinni illoqarfinnilu sorlorni ilinniartinneqalersut, suullu ilinniartitsissuutaalerpat?

3-mut) Aalisartut amerlasuut aalisarunnaarlutik soraarninngornissaminnik kissaateqartut ilimagineqarsinnaavoq. 2024-mi aqutsiveqarfik 47-mi umiatsiaararsortut 192-it 60-nik ukioqarput utoqqaanerullutilluunniit.

Inuusunnerusut ilinnialerniarlutik aalisarunnaarusukkunik tamanna nammineq aalajangissavaat. Sinerissap qanittuani aalisartut 2023-mi 18-29-villu akornanni ukiullit 340-put, 30-39-villu akornanni ukiullit 366-siullutik. Tassani ilaatigut pikkorissarnissaq pillugu imaluunniit ilinniakkat suut kissaatiginerlugit Majoriamut saaffignissinnaapput. Immikkoortuni amerlasuuni, matumani ilanngullugu aalisarnek sulisunik ilinniarsimasunik pisariaqartitsineq annertuvoq. Sunik ilinnialerusunneq apeqqutaatillugu nutaamik ilinnialernissamut apeqqut inummiippoq.

4) Naalakkersuisunik aamma oqaatigineqartoq ilinniartitseqqinnissanut tunaartassat pilersaarusionerqartut. Ilinniagaqalernissaat eqqarsaatigalugu Naalakkersuisoqarfiit sorliit pilersaarusinermi peqataappat?

4-mut) Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik ilinniarfeqarfiit attuumassuteqartut peqatigalugit ilinniartitaanerup pilersaarusioneranut akisussaasuvoq.

5) Politikkikkut aqqissuussinerit pissutigalugit suliffimminnik annaasaqartussat aammalu nammineq pigisaminnik illuminnik qimatsiinnartariaqalersussat Naalakkersuisunik aningaasanik taarsiifigineqassappat?

5-mut) Naamik, aalisarnerup ineriartornissaanut tunngaviusussanik aalisarnek pillugu inatsit aalajangersaassaaq, kisianni aalisartut ingerlatseqatigiiffiillu ineriartorneq taanna qanoq aaqqiissuteqarfigerusunnerlugu nammineq aalajangissavaat – aamma inatsimmi tunngavigineqartup iluani ineriartorusunnerlutik. Siunnersuutip malitsigisaanik suliffinnik aamma pigisanik imaluunniit inigisanik annaasaqartoqassasoq inatsimmi takuneqarsinnaanngilaq.

Aalisartunut tunngatillugu naqissuseqqinneqartariaqarpoq aalisarnermiit pinngitsaaliilluni anisitsiniartoqanngimmat. Paggatassiissutinik aalisarnermik ingerlatiinnarsinnaavaat aammali PNNP-mik aqqissuussamut ikaarsaarsinnaapput taamaalillutillu aalisarnermi toqqammavik taanna atuinnarlugu. Illuatungaanili aqqissuussamit ingerlasumit matumanga aalisarunnaartut PNNP-milli aqqissuussami aalisartut pisassiissutinik nammineq pigisaminnik tunisisinnaalissapput taamaalillutillu aninerminnut atatillugu aningaasanik pissarsisinnaalissallutik.

6) Namminneq illugisaminnik qimatsiinnartussat illoqarfimmi najugariligassaminni illumik tunillugit taarsiifigineqassappat?

6-mut) Naamik, aalisarnerup ineriartornissaanut tunngaviusussanik aalisarnek pillugu inatsit aalajangersaassaaq, kisianni aalisartut ingerlatseqatigiiffiillu ineriartorneq taanna qanoq aaqqiissuteqarfigerusunnerlugu nammineq aalajangissavaat – aamma inatsimmi tunngavigineqartup iluani ineriartorusunnerlutik.

Apequt 5-imut akissuteqaat aamma takuuk.

Inussiarnersumik inuulluaqqusillunga



Kim Kielsen

Aalisarnermut Piniarnermullu Naalakkersuisoq